

QUÆSTIO MEDICA,

CARDINALITIIS DISPUTATIONIBUS,
manè discutienda, in Scholis Medicorum, die Jovis
sexta Martii.

CAROLO MARTEAU, Doctore
Medico, Præfide.

An febris hectica balneum?

I.

FEBRIS calor est præter naturam cor primariò, hinc reliquum corpus afficiens, omnes omninò functiones lædens: solo incremento ab insito distinctus, qui vitæ, idem & necis fit author auctus calor. Neque tamen igneus quivis fervor febris audiat. Hæc omnium prope morborum comes & affecla, neminem non jugulat, infantulum in utero conceptum, & senem annorum numero confectum: quin etiam febris obnoxii sunt, qui nec in victu, nec in ulla alia re peccant. Alias continuo, alias discreto insultu hominem aggreditur, nulla est quæ non remittat: nulla periculo vacat: intermittenti enim sua est pernicies, suum quoque contagium. Cumque modò spiritus, modò humores, modò & totius corporis partes similes potissimum incandescant: hinc alia ephemera, alia humida, alia hectica jure nuncupatur. Quæ tria genera simul aliquando deprehenduntur, dum spiritus humores & partes unà incalescunt.

II.

HECTICA febris caloris est immoderatio, quæ continuo jugique incendio humidum primigenium depopulatur, quasi ignis affixus inhæreat cordi, & aliis solidiori-

bus partibus : quæ tamen planè non marcescunt, nisi propè fuerit absumptum illud oleosum humidum, quo potissimum à primordio vitæ donatæ fuerunt. Ephemeram aut ardentem febrem ut sapissimè excipit hæctica ; nonnunquam ira, mœroris, aliarumve causarum soboles est. Tunc leviora habet initia, ut etiam æger se febricitare non sentiat, nisi post partum ; quasi ut in calce ab aqua, sic in ægotante corpuscula ignea ab alimento sumpto concitentur. Et licet cor ipsum, aliasque solidiores partes conficiat ; harum tamen siccitas vix deprehenditur, nisi prius omni adipe, imò & carne fuerint destitutæ. Lenta febris symptomatrica, ut & colliquans, hæc brevi, illa gradatim, totum quoque corpus grandi macie efficiunt : neutra tamen hæctica dici potest ; quæ cum sensim insidietur vitæ, hinc tres hujus gradus designantur. Primus obscurus remediis balneo potissimum facile cedit : notior alter ægrè curatur ; tertius aspectu horridus, planè immedicabilis evadit, fitque marasmus, cui non magis, quam marcori ex senio conveniunt remedia.

III.

LICET autem obscura satis & leviora sint incipientis febris hæctica indicia, progressu tamen temporis fiunt manifesta. pulsus exilis est pusillus & creber formicanti similis : sed sumpto alimento major evadit, cum arteriæ calore sensibili conjunctus : vires languent, suo adipe partes destituuntur, caro ipsa absimitur, totum liquefcens corpus emaciatur & tandem ad marasimum seu tabem exquisitam accedit. Tunc prominent tempora, frons siccatur, oculi intro reconduntur, genæ pellis exustæ instar aspectu graves videntur, tabescit pectus, cor ipsum emaruit, præcordia extenuata sunt, umbilicus quasi lumbis affigitur, gracilescunt artus, universum denique effœctum squalet corpus, & quasi scheletum horrida cute contextum deprehenditur. Tantam calamitatem præcavebit æger, dummodò circa morbi initia, vel tardius ubi subest aliqua partium siccitas, mœdētis opem imploret. Procul jam absit labor, & quævis immodica exercitatio ; absint quoque vigiliæ, ira, mœror & omnis animi motus violentus, hæctis noxia est purgatio, nisi mitius medicamentum fuerit cum alimento mixtum ; minus insensa

venæ sectio parca manu facta; vinum venenum voluptarium; potus sit aqua ipsa fluviatilis, vel ptisana ex hordeo, etiam ex seminibus frigidis, & radice glycyrrhizæ parata; humida sit, pauloque frigida victus ratio; laudantur admodum juscula carnis vitulinæ pullorum & similia etiam cichoraceis medicata; toto febris tempore, ubi quoque imminet marasmus, lac bibatur asininum, imo & vaccinum, si ventriculo negotium non faciat. Sed cuncta ut plurimum sient frustra, nisi sub initio morbi, aut saltem intra secundi gradus limites, per plures dies in balneum æger fuerit immersus.

I V.

BALNEUM intellige dulcis aquæ tepentis in folio congeriem factam, cui æger immergatur. Apagē natura vel arte medicatas aquas: vix enim carent insensa qualitate, qua totum corpus perfundunt; thermas inter balnea noli confundere. Si fuerit paulò calidior aqua, spiritus dissipando vires exoluit, humores colligando fluxiones in partes imbecillas movet, viscerum jam ferventem auget intemperiem, siccitatem inducit, totumque corpus, adeo vehementer exagitat, ut si vel plethoricum, vel impurum fuerit, morbo promptè tentetur. Frigidior aqua rigorem parit, cutis spiramenta occludit, spiritus, coercet, ne quoque calorem insitum extinguat, timendum. Si vero tepens fuerit aqua, multa commoda toti corpori largitur, viscerum æstuantem intemperiem compescit, siccitatem emendat, omnia humectat, ac modicè refrigerat, implet extenuata, habitum meliorem reddit, nec quicquam sudore, halitu vè digerit, quin etiam & ferunt frequenti lavatione tepida, prope funeratorum, nihil præter nervos & luridam pellem gerentium, membris grata vice rediisse habilem vigorem, genis decentem colorem. Quocirca tepens balneum verè creditur hæticis accommodatum: qui squalidi extenuatique fiunt, & quibus jam aliqua partium solidarum inest ariditas.

V.

BALNEUM aquæ tepentis multis morbis medetur, diabeti, dolori nephritico, uteri, lienis, aliorumve viscerum variis affectibus, delirio, capitis dolori, oculorum inflam-

mationi, febri intermittenti, imo & variolarum eruptionem
promovere censetur, nec tuto salivatione curatur lues vene-
rea, nisi balneum præcesserit. Sed in hoc æger non immer-
gendus nisi paratus. Prius omnis plethora summoveatur &
alvinæ regionis impuritas; nec ulcere pulmo nec ulla pars
alia interior abscessu tentetur: vires pares sint ferendo re-
medio, ut propterea marasmo & marcori ex senio minime
conferat. Febris verò hæcticæ quæ ad tertium gradum non-
dum accesserit, præcipuum est remedium. Siquidem ignem
latefcentem & partibus affixum refrigerando temperat:
oleosi humoris effluxum partiumque ariditatem humectando
præpedit: adipis sicut & carnis liquationem arcet: vires ad-
dit somnum conciliando: totumque corpus nutritionem pro-
movendo, vegetius habitiusque reddit. Non jejunos bal-
neum subeat æger, ne exolvatur, nec statim à pastu, ne ali-
mentorum dissolutionem inturbet; sed sub vesperam tri-
bus horis post pastum; & per aliquod tempus pro virium
modulo in folio sedeat: quo egressus quiescat jacens in lecto,
& cibo convenienti reficiat vires. Sic enim laudatis balnei
commodis potietur.

Ergo febri hæctica balneum.

Asserebat Parisiis JACOBUS SIMON GILLES
DE LA RIVIERE Cenomanus, Baccalaureus
Medicus. A. R. S. H. 1698.

Apud Franciscum Muguet, Regis & Facultatis Medicinæ Typographum.